



Área de apoio á Alcaldía

Anotada en el Libro de Resoluciones
de la Alcaldía con el num: DEC/AYT/2534/2018
04/06/2018
El Oficial Mayor
P.O.

DECRETO DA ALCALDÍA

Con motivo da chegada do verán e das festas de San Xoán, esta Alcaldía considera oportuno facer un chamamento á cidadanía para que as actividades tradicionalmente ligadas á tempada estival e as festas se desenvolvan de forma cívica e responsable á vez que se toman medidas para que os servizos municipais podan funcionar con eficacia.

Para iso acudiuse á forma do Bando do Alcalde, que ten un profundo raizame no noso sistema local e que aparece como a maneira máis directa de poñerse en contacto coa veciñanza para convocalo a participar no acontecemento á vez que se lle lembran as normas de comportamento adecuado.

En consecuencia, e facendo uso da atribución que confire á Alcaldía o artigo 124.4 g) da Lei 7/85, de 2 de abril, Reguladora das Bases do Réxime Local e o artigo 7.3 do Regulamento de Servizos das Corporacións Locais,

Resolvín:

Aprobar o Bando para a regulación das festas de San Xoán, que figura como anexo deste Decreto.

Publicar anuncios na prensa local, no taboleiro de edictos e no portal corporativo, sen prexuízo da utilización doutras formas de comunicación, para dar a máxima difusión ao Bando.

Casas Consistoriais da Cidade da Coruña, a dous de xuño de 2018.

O Alcalde,

Xulio Xosé Ferreiro Baamonde



BANDO MUNICIPAL QUE REGULA AS ACTIVIDADES ESTIVAS REFERIDAS A BARBACOAS, CHURRASCADAS, SARDIÑADAS E SIMILARES E AS ACTIVIDADES DAS FESTAS DE SAN XOÁN

Prezadas veciñas e veciños,

Coa chegada da época estival e do maior uso da vía pública para realizar actividades recreativas, informo das pautas que deberán seguirse para levar a cabo sardiñadas, churrascadas, barbacoas e similares para celebrar as festas de San Xoán e evitarlle así riscos innecesarios e molestias á veciñanza. Deste xeito, poderemos desfrutar dunha cidade que coide a boa convivencia, o respecto e a tolerancia, así como corresponsabilizarnos como cidadanía para evitar e alertar ante calquera manifestación que vulnere a liberdade e o gozo das persoas atendendo especialmente ás violencias machistas, LGTBQ fobias, racistas ou xenófobas.

Así, facendo uso da facultade que me concede o artigo 124, letra g, da Lei 7/1985, do 2 de abril, reguladora das bases de réxime local,

FAGO SABER:

SARDIÑADAS, CHURRASCADAS OU SIMILARES

- Permítese realizar sardiñadas, churrascadas ou similares en espazos de titularidade pública. **As datas para a dita autorización van desde o venres 15 de xuño até o domingo 1 de xullo (ambos incluídos)**. Para isto, será preciso que as persoas interesadas presenten unha **comunicación previa** por escrito á Área de Seguridade Cidadá, cunha antelación mínima de **24 horas** da realización da actividade.
- O concello dispón na páxina web dun modelo indicativo de comunicación previa co contido indicado no apartado de normas comúns.
- O apartado de Seguridade Cidadá da web do concello contén consellos e recomendacións relativos á seguridade desta actividade.
- As actividades mencionadas deberanse realizar entre as 13.00 e as 16.00 horas e entre as 20.00 e as 00.00 horas.
- Deberá gardarse unha distancia de seguridade a elementos combustibles ou que poidan resultar danados (mobiliario urbano, vehículos, cristaleiras, colectores do lixo, zonas agrícolas ou forestais etc.) e a instalacións de risco (liñas eléctricas, tubaxes de gas etc.).
- A distancia de grellas e barbacoas ao arboredo será, cando menos, de 10 metros.
- A grella ou similar non poderá estar apoiada directamente no pavimento nin na vexetación; deberá situarse ou ben elevada do chan ou ben empregando unha prancha metálica separada do pavimento cunha capa de area dun mínimo de 10 cm de altura.



- Non está permitido usar combustibles líquidos nin acelerantes nas sardiñadas, barbacoas nin similares. Non se poderán queimar materiais plásticos, madeira lacada, escumas nin outros materiais tóxicos ou que produzan fumes tóxicos
- As beirarrúas deberán quedar libres para permitir o tránsito peonil e o lume conservarse en pequenas dimensións, de forma que poida ser controlado en todo momento.
- A saída de fume debe ser libre cara ao exterior e non poderá estar cuberta de instalacións do tipo carpas, toldos, lonas etc.
- Ao rematar, e antes de abandonar o lugar, as persoas responsables da organización coidarán de que as cinzas queden totalmente apagadas. Se for preciso, empregarán auga e area.
- Será obrigatorio limpar o espazo autorizado, incluídos os elementos utilizados para o seu desenvolvemento, inmediatamente despois de que remate a actividade. En caso contrario, aplicaranse os artigos procedentes da Ordenanza de xestión de residuos municipais e limpeza viaria relativos a gastos de limpeza e sancións.
- O concello recomenda minimizar os residuos, empregando, na medida do posible, vaixela e cubertos reutilizables ou, no seu defecto, papel e cartón. Os residuos serán depositados nos contedores correspondentes de orgánico, inorgánico, papel e vidro.
 - Tendo en conta que estas actividades se levan a cabo en datas comprendidas dentro da época de máximo perigo de incendios forestais, sempre se estará ao disposto pola Consellería de Medio Rural no referente ao índice de risco de incendio e ás posibles prohibicións derivadas del.

FESTAS DE SAN XOÁN

Condicións para realizar as cacharelas

- Autorízase realizar lumeiradas en espazos de titularidade pública. Para isto, será preciso que as persoas interesadas presenten unha **comunicación previa** por escrito á Área de Seguridade Cidadá, antes do día 22 de xuño ás 15.00 h.
- O concello dispón na páxina web dun modelo indicativo de comunicación previa co contido indicado no apartado de normas comúns.
- O apartado de Seguridade Cidadá da web do concello contén consellos e recomendacións relativos á seguridade desta actividade.
- Durante as festas do San Xoán, segue vixente o disposto para zonas de exclusión e zonas de especiais coidados nas normas xerais deste bando.
- O horario para baixar o material para as fogueiras das praias da cidade será, atendendo ás táboas de mareas, a partir das 19.30 h do día 23 de xuño. O repartimento de madeira a pé de praia producirase ás 19.00 horas.
- Prohíbese o baño nas praias da cidade desde o día 23 de xuño de 2017 ás 22.00 h até as 9.00 h do día 24 de xuño de 2018.
- As cacharelas non poderán ter una altura superior á que determinen os servizos de urxencias e seguridade municipais que as inspeccionen, e que en todo caso estará en función da súa localización, das distancias aos edificios e a outros elementos da contorna.



- Non se poderán realizar fogueiras preto de colectores de toda clase de residuos, vehículos, vivendas etc. (seguindo os criterios do punto anterior e sempre cunha separación mínima de 5 metros).
- As lumeiradas manterán unha distancia de 20 metros ao arboredo. Un radio de 5 metros con relación á fogueira estará libre de vexetación que poida arder. Non se poderá utilizar o arboredo para suxeitar cadros eléctricos, altofalantes, carteis, etc. nin obxectos punzantes para colgar neles calquera outro material ou elemento.
- Non está permitido o uso de combustibles líquidos nin de acelerantes. Así mesmo, está prohibido queimar plásticos, cauchos, rodas, colchóns, madeira lacada, gomaespuma e outros obxectos que poidan producir gases tóxicos, especialmente na praia, onde tampouco se queimarán mobles nin obxectos voluminosos e madeiras que leven puntas ou cravos.
- As fogueiras só se poderán acender protexendo o chan cunha capa de area mínima de 10 cm de espesor ou materiais semellantes.
- Queda terminantemente prohibido trasladar colectores de residuos e cambiar a súa localización, debido aos desaxustes que isto causa na recollida de lixo durante os días posteriores ao San Xoán.
- As fogueiras, sardiñadas e barbacoas que se realicen deberán contar cun medio extintor de lume (extintores, caldeiros de auga ou area), co fin de afrontar calquera tipo de eventualidade.
- As praias deberán estar libres ás 6.00 h do 24 de xuño para que a concesionaria responsable do servizo de limpeza poida levar a cabo as actuacións necesarias para habilitar a praia para o seu uso común. Ante calquera urxencia que poida xurdir, os servizos de urxencia do concello poden ordenar a evacuación obrigatoria da praia antes desta hora, baseándose en criterios de seguridade persoal e protección ambiental.
- Non está permitido baixar con vidro ás praias. Os residuos depositaranse nas zonas de recollida habilitadas para tal fin nos accesos á praia.

Circulación no paseo marítimo

- O día 23 de xuño de 2018, pecharase a circulación no paseo marítimo na zona das praias de Riazor, Orzán e Matadoiro desde as 19.00 h. Os servizos de seguridade e urxencias reestablecerán o tráfico segundo evolucionen as previsións dos ditos servizos.
- Facúltase o director do Plan de autoprotección para modificar estes horarios se for necesario.

Servizos de seguridade e urxencias

- Os servizos de seguridade e urxencias municipais (Policía Local, Servizo de Extinción de Incendios e Urxencias e o Servizo de Protección Civil) velarán polo cumprimento do regulado nesta disposición e no resto das ordenanzas municipais, de xeito que se as persoas responsables de instalación, actos, eventos (incluída a realización de fogueiras, sardiñadas, barbacoas e similares) non as retiren ou non as modifiquen voluntariamente no caso de ser requiridos para iso por razón de seguridade, poidan acceder á súa retirada inmediata e



traslado onde se considere necesario, sen prexuízo da iniciación, no seu caso, do expediente sancionador que puiden corresponder.

Transporte público

Establecerase un dispositivo especial de transporte público, consistente en oito liñas especiais que comunicarán os barrios coa praza de Pontevedra, cunha frecuencia de 15 minutos entre as 00.30 h e as 2.30 h, e o Bus Búho entre as 3.00 h e as 06.30 h cunha frecuencia de 30 minutos. Todas estas frecuencias son aproximadas e poderán variar en función do estado do tráfico.

Eventos e actos, sardiñadas, barbacoas e similares na noite de San Xoán

Excepcionalmente, esta noite poderán organizarse sardiñadas, barbacoas e similares, sen previa comunicación á Área de Mobilidade - Actividade de Policía, sempre e cando non ocupen calzadas nin entorpezan a circulación de vehículos e cumbran co resto das normas comúns contidas neste bando.

NORMAS XERAIS

Comunicación previa da actividade

- A comunicación contará cunha declaración en que a persoa solicitante manifieste que cumpre os requisitos establecidos no bando para o exercicio da actividade, sen prexuízo das facultades de comprobación, control e inspección que ten atribuído o concello.
- Na comunicación previa, identificarase como mínimo a dúas persoas maiores de idade. Deberá indicarse o nome, o NIF, o enderezo e o teléfono. Estas persoas responderán dos danos que se poidan causar tanto a terceiras persoas como no dominio público.
- A comunicación non supón ningunha excepción respecto do cumprimento das normativas sectoriais de ruído, lumes etc. nin afectará aos dereitos de terceiras persoas.
- A inexactitude, falsidade ou omisión de carácter esencial de calquera dato ou información que se incorpore á comunicación determinará a imposibilidade de continuar co exercicio da actividade afectada desde o momento en que se teña constancia de tales feitos, sen prexuízo das responsabilidades penais, civís ou administrativas que procedan.

Zonas de exclusión e excepcións

- Como norma xeral, non se permitirá realizar **churrascadas, sardiñadas nin lumeiradas** en zonas forestais ou baixo o arboredo de parques e xardíns. As grellas e barbacoas deben manter unha distancia mínima de 10 metros de distancia ao tronco das árbores. As cacharelas deben situarse a un mínimo de 20 metros do arboredo para evitar danos que aconteceron reiteradamente en anos anteriores.



- Nas zonas de exclusión non se poderá prender lume de ningún tipo, mentres que nas zonas de especiais coidados, o concello pode establecer limitacións.
- Son zonas de exclusión, onde non está permitido facer lume, a totalidade do trazado do oleoduto, o Parque de Bens e o Monte de San Pedro, os Xardíns de Méndez Núñez, os Xardíns de San Carlos, a praza das Bárbaras e a contorna da Torre de Hércules, incluído o merendeiro das Lapas, que non a praia, sen prexuízo de que os servizos de Seguridade poidan designar algunha outra zona baseándose en criterios de protección das persoas e os bens públicos.
- A continuación, establécense zonas de especiais coidados, en que o concello pode establecer limitacións ou localizacións alternativas de cumprimento obrigado. O concello poderá definir en todo momento outras zonas de especiais coidados.

ZONA DE ESPECIAL COIDADADO	ALTERNATIVA / NORMAS
Praza de Azcárraga, baixo o arboredo	Praza de Azcárraga, no perímetro sen arboredos.
San Pedro de Mezonzo, zona arborizada, cara á rolda de Nelle	Situar na zona contraria ás árbores, cara a Félix Estrada ou baixar a altura das lapas.
Zona arborizada do Barrio das Flores	Manter distancia co arboredo e baixar a altura das lapas.
Parque de Santa Margarita	Só no anfiteatro. Evitar zonas arborizadas.
Zona arborizada fronte á estación de autobuses na rúa dos Alcabaleiros	En fronte, Marqués de Figueiroa.
Campo da Leña	Só fóra do perímetro arborizado ou situar o lume na praza das Atochas.
Campo de Marte	Só fóra do perímetro arborizado.
Praza de Monforte	Protexer o pavimento e baixar a altura das lapas.
Campos e contorna vexetada da Torre de Hércules	Parque de Carlos Casares, contorna do cárcere.

Infraccións e sancións

- As infraccións das presentes normas serán denunciadas, tramitadas e sancionadas de conformidade coa norma xurídica que resulte de aplicación en cada caso.



- Nos supostos recollidos na lexislación vixente e sempre que existan razóns de seguridade que o aconsellen, o Corpo de Policía Local poderá, como medida cautelar, comisar ou retirar todo tipo de materiais, instalación ou bens mobles en xeral, logo de llelo requirir ás persoas interesadas cando iso for posible. Se o comisado fose perecedoiro, destruírase ou entregaráselles a centros benéficos.

NORMAS COMPLEMENTARIAS

- A Área de Seguridade Cidadá queda autorizada para ditar as instrucións complementarias que esixan as circunstancias e o desenvolvemento dos festexos.

VIXENCIA

- O presente bando estará en vigor desde o día da súa publicación no taboleiro de anuncios do concello até as 00.00 h do 1 de outubro de 2018.

A handwritten signature in black ink, consisting of several overlapping loops and a vertical line, positioned centrally below the text.